

四庫全書

集部

欽定四庫全書

集部

浮溪集卷四至

詳校官庶吉士臣翁樹培

侍讀臣孫球覆勘

總校官檢討日何思鈞

校對官編修日朱攸

謄錄監生日蔣知廉

欽定四庫全書

浮溪集卷四

宋 汪藻 撰

表

奉上宣和皇太后冊寶賀表

准進奉院報十二月十二日奉上宣和皇太后冊寶者  
凝旒南面奉冊東朝誠格兩儀益見孝心之至風行四  
海咸知母道之尊恭惟皇帝陛下聖貫羣倫行高百世

念龍飛之有日瞻駸駕以無期懷思屢廢于寢齋祈請  
幾殫于書幣未暨湖南之教猶虛溫清之儀大橫之兆  
庚庚久當迎奉城穎之詩洩洩行即旋歸輯大議于曲  
臺加徽稱于長樂臣叨臨支郡阻簞近班二妃夙媿于  
重華雖同遠狩十亂莫尊于文母還佐中興

冊皇后表

帝圖內治天錫柔儀前占龜筮之祥懋舉禕禴之禮伏  
以坤承天而乃順月受日以為明不表徽音孰宣陰教

既輔成于全盛宜登配于至尊恭惟皇帝陛下誠以齊  
家孝于尊禰爰正軒星之象用承長樂之顏臣久冒明  
恩欣逢盛典雖外庭稱慶莫陪百辟之趨然輔郡承流  
首被二南之化

賀皇太子正位表

伏審顯膺寶冊升位春宮臨軒行曠古之儀見廟示承  
祧之重恭惟皇太子殿下分輝寶緒毓粹璿源挺天人  
岐嶷之資稟神聖徇齊之教當周室本支之盛獨冠百

男宜漢家羽翼之成無煩四皓前星外炳游震中潛某  
幸列宗枝喜隆邦本河潤九里方率族以依仁月有重  
輪願登歌而薦祉

皇子賀北郊禮成表

宿齋路寢哀對方丘至哉坤元肇享精誠之報達于天  
下均蒙持載之安恭惟皇帝陛下體道寧神諏經制禮  
刊循誦習傳之陋講貴誠上質之儀甫候一陰之生踵  
修三歲之祀為下必因川澤既合羣靈成功可告神明

遂膺多福臣幸當稚弱親睹休嘉知窮壤之俱尊與臣  
民而同慶

又

出次明堂肇禋方澤稱典禮威容之盛契神明精禋之  
交燕及生靈同深慶賴恭惟皇帝陛下中天而立法地  
之宜眷言博厚之功未極尊崇之報稽古稱制前期庀  
官仍犧牲圭幣之宜正時日壇場之謬匪頒從約儀衛  
去煩整法駕以躬臨出宸衷之義起辟公相牲以陪後

髦士奉璋而在廷孫竹發揚媪神娛喜竝垂錫羨允答  
休成臣夙荷慈憐欣逢熙盛稱慶莫班于階城卜年願  
比于岡陵

又

講頌祇之美報修尊祖之上儀天蹕順旋海隅胥悅恭  
惟皇帝陛下德業淵妙精誠靜專踵行三歲之祠竝答  
兩儀之貺謁款郊時修明國章地求習坎之方物取上  
黃之象合于經誼黜汾雎就祭之文揆厥本原追神考



欲行之志臣幸當幼學親睹稔容聞熙事之告成與外  
朝而同慶

又

迎日之陰莫琮而祭發揚厚德登就吉儀正園丘竝祀  
之文為夙古不刊之法六飛還御四海交欣恭惟皇帝  
陛下出撫亨期備膺諸福獨化陶鈞之上儲精蠖濩之  
中神罔時恫地不愛寶乃尊母事之禮祇見澤中之丘  
從祀山川共樂咸池之奏告成天地更觀梁甫之儀臣

幸託天枝早蒙聖澤慶方輿之隕社阻文石之稱觴

又

郊兆宗祈歸功于厚載國章時舉精意以親祠逮茲竣  
事之初咸有受釐之慶恭惟皇帝陛下成能三極修理  
百神斂時民物之休推本乾坤之造候星躔之日永嚴  
法駕以天行昭對后祇侑登皇祖器尚陶匏之質牲從  
繭粟之誠宣函鍾靈鼓之和備袞冕元圭之盛因地事  
地共觀熙事之成匪今斯今何止豐年之應臣幸蒙聖

澤親睹明禋進趨雖隔于外庭鼓舞實同于庶物

又

種柴升燎先款于圓壇郊血告幽繼稱于陰祀懋叶熙  
成之慶均蒙錫羨之恩恭惟皇帝陛下承七聖之休撫  
百年之盛文物聲明之悉備神祇祖考以咸安肅駕天  
行嚴禋地載鼓鐘具奏符周樂之八成壇壝更新陋漢  
儒之五徙豐年紹至嘉物荐臻臣早蒙加惠之深未預  
成人之列觀瞻有煒榮抃實多

劉相公賀明堂禮成表

建重屋以崇成因剛辰而肇祀一人昭事萬寓駿奔竊  
惟三代之君皆備九筵之饗維時去古寢更秦漢之餘  
設位從宜莫正房心之次會逢熙旦蒐講上儀求遺蹤  
千載之前得妙意六經之表諸儒聚訟嘗憂改作之難  
一日成能始媿習傳之陋恭惟皇帝陛下坐兼衆妙躬  
享丕平凡赫然庶事之新皆斷以淵衷之獨曲盡合宮  
之制靡逾旬歲之期將視朔以頒朝先饗親而配帝昭

合我將之頌無煩玉帶之圖精祕潛通觀瞻有煒臣久  
陪近著甫隔清光莫與英髦共秉文王之德徒聞熙事  
遙興太史之嗟

皇子北郊青城起居表

輿衛天行親講頌祇之禮臣工宿戒交修扈聖之儀當  
解愠之清和宜儲精之晬穆恭惟皇帝陛下接千歲之  
統合三神之歡膺多福以履至尊舉祿威而明德意肇  
修陰祭哀對坤靈千廬星列于壇場萬騎雲屯于次舍

協氣旁達祥光上浮臣方習幼儀莫陪顯相嘉與函生  
之類共憑持載之安遙企威尊惟深慶抃

又

對越坤靈佑登皇祖即惟宮而展采端冕服以薦誠惟  
孝子必見其所為齋故地祇皆出可得而禮恭惟皇帝  
陛下緝熙純嘏統攝羣元推本盛儀比隆治古乃嚴宗  
祝之莫茂格媪神之休陳百物之具修儼千官之容衛  
瑞氣承宇靈光燭壇臣方習幼儀未親外傳莫綴侍祠

之列惟深憲聖之誠

又

順移天仗祗就國陰遵路寢之經塗宿齋宮之大次恭  
惟皇帝陛下誠參高厚幽贊神明執古御今刺六經而  
制禮尊天親地窮萬物以報功謂郊丘合祭之文繫宗  
祝習傳之陋乃叶長贏之候特修禋瘞之儀兩圭有邸  
以陳前五嶽眎公而陪後臣禮當踐豆年未勝衣庶物  
具宜官備展牲之夕清光在望心馳省膳之朝

又

警清蹕以戒行奠黃琮而昭見已臨大次將舉祲容當  
時燠之靡煩煥靈光而旁燭恭惟皇帝陛下宅尊四海  
成位兩儀會有極以居中秩無文而咸祀順迎長夏祗  
款方壇嶽祗瀆鬼以悉臨風馬雲車而來下臣年當幼  
學班隔外廷稽古禮文遙想奉璋之盛違顏咫尺徒深  
向日之誠

又



函鍾八變將修大祭之儀陞戟百重密警周廬之衛舉  
典容而創見殫誠物以駿奔恭惟皇帝陛下道與時升  
禮由義起謂一郊二祭之合非三代六經之傳弗諱屬  
車之勞躬臨方澤之祀壇垓在望籩豆告陳獲獲深思  
豐融來應臣屬當齟齬莫侍冕旒徒瞻睟穆之光無補  
肅雍之相

又

肇稱幣玉修泰折之明禋夙屆郊宮拱鉤陳之衆衛一

人齋被萬宇駿奔恭惟皇帝陛下出乘昌期奄有諸夏  
極天所覆皆予相祀之臣環海之間備厥豐盛之物卻  
懋功而不有推美報于無窮歌昊天成命之詩明萬物  
資生之德惟至誠能參化育允答坤元凡有氣莫不尊  
親載嚴母事臣尚嬰觴鞮莫執豆籩方暫闕于清間期  
早膺于錫羨

昭慈獻烈皇后殯宮朝拜表

臣某言伏以比陳廡衛奄畢窆封顧孝養之永遠罄哀

宗而何及謹差某官奉表奏告以聞臣某謹以推以感  
頓首頓首謹言

昭慈獻烈皇后祔廟畢殯宮旦望等表

八月旦

伏以宮壺興哀屢改階萱之旦寢園在望俄驚陵柏之  
秋恭惟昭慈獻烈皇后位正累朝德齊先后仙遊雖邈  
慈矩具存地隔三山莫獻蟠桃之實神歸九廟長遊大  
練之衣適遇蕭辰何勝永慕

秋社

伏以宮衣揜御已虛夏清之儀農扈報功忽屆秋成之  
候恭惟昭慈獻烈皇后儷天德大救物功深既鍊石以  
告成遽乘雲而不返追攀無及感愴奈何

中秋

伏以長樂終天人結母慈之戀薦收告節月圓秋氣之  
中觀玉瑄之屢移望柏城而增愴恭惟昭慈獻烈皇后  
體姜任之德希黃老之踪倏赴帝鄉之期永違天下之

養母懷遺訓徒極哀悰

九月旦

伏以軒星既掩駸駕莫還方興長夜之哀忽屆杪秋之序恭惟昭慈獻烈皇后功參十亂道冠六宮問寢承顏一朝違長樂之養祔姑合食千載奉泰陵之遊搖落有懷追攀無所

重陽

伏以種稜告成嘗帥九嬪之獻菊萸在薦莫伸萬壽之

祈恭惟昭慈獻烈皇后厚德倪天徽音垂世自哀纏于  
厚夜忽時及于凋年爰致孝思式陳時薦

九月望

伏以椒掖戒寒柏城無曉永隔乘雲之馭倏更濡露之  
辰恭惟昭慈獻烈皇后化首宮闈澤流寰宇念纂承于  
丕緒蒙保佑之隆恩緬想徽音何勝孺慕

十月朔

伏以釁結終天時丁良月雖闕宮之在望瞻大練以無

階恭惟昭慈獻烈皇后夢月鍾靈補天儷德奄隔長昏  
之養屢驚弦晦之遷睹茲流光何勝永慕

下元節

伏以驗灰緹室將觀一氣之回校籍清都莫重三元之  
畢緬思慈範永隔仙遊恭惟昭慈獻烈皇后所憂在賢  
以儉為寶方俟含飴之慶遽興復土之哀爰即佳辰載  
陳誠薦

十月朔奏告太祖皇帝表

伏以時丁良月嘉萬寶之既成節逼週年悵三微之將  
復恭惟太祖皇帝陛下功彌宇宙澤浹絃經光垂鴻業  
之餘燕及眇躬之嗣因節寒之始屆致時莫以遐思

徽宗皇帝梓宮還闕慰表

輿衛遐征千年厭世衣冠永閔萬里還京痛纏宸極之  
尊哀被海隅之遠恭惟皇帝陛下躬承龜鼎慕見羹墻  
龍髯既絕于中天蜃路嘗淹于異域雖迎瞻引綽動一  
人罔極之思然歸祔廟桃實千古非常之事願寬聖抱



俯慰羣心

顯肅皇后梓宮還闕慰表

慈極終天靈輻返國凡居持載孰不哀摧恭惟皇帝陛下  
下功懋承祧孝深陟屺念昔從周狩莫陪八駿之歸幸  
今祔漢陵當樂千人之聚孺慕雖鍾于此日母儀如見  
于平生願抑聖情少安羣下

懿節皇后梓宮還闕慰表

隗駕當還龍輻乃至變俄生于坤載哀尤切于宸衷恭

惟皇帝陛下運啓中興教先內治汲汲方求于故劔迢  
迢已隔于靈津瞻六引之來歸撫九嬪而增慟然數存  
修短而禮極哀榮願裁臨感之悲永副蒼生之望

浮溪集卷四

欽定四庫全書

浮溪集卷五

宋汪藻撰

表

謝進書賜銀合茶藥表

臣藻言伏蒙聖恩以臣再投進編次元符庚辰以來詔旨一百冊賜臣茶藥并銀合各一具遣成忠郎樞密院准備差使胡澤就臣所居給賜者膚使臨存貸其猥釀

寶奩頒賚實以珍芳非幽屏之宜蒙辱陰私而反懼伏  
念臣昨者奉承明詔蒐補闕文遭漢家百六之裁漫無  
載籍取武成二三之策烏足成書方虞抵牾之誅忽拜  
便蕃之賜茲蓋伏遇皇帝陛下軫羹牆之念矜鉛槧之  
勞分北苑之上腴用濡燥吻乞西山之靈劑使制頽齡  
眷尚不忘報將安所惟悉哀于凡目庶少補于毫分方  
多事之搶攘未嘗汗馬豈餘年之晚晚敢復捐書

謝進書特授左中大夫表

臣藻言伏奉告命以臣再修到元符庚辰所編詔旨等  
特授臣左中大夫者國史補亡雖日勤于采獲君恩馭  
幸乃歲冒于遷除矧方抱于遺弓忍獨榮于載筆上還  
不獲退省為憂恭以太上皇帝聖學高明天資仁厚承  
熙治百年之後享安樂兩紀之餘凡今言動之所傳視  
古詩書而無愧祗緣誤國之相繼循致陟方而不還既  
海隅皆服于堯喪宜柱下一新于漢注風蒙垂付適幸  
纂成豈謂皇帝陛下明發有懷兼收罔棄嗟夏時之既

失于祀莫稽幸商頌之復全以那為首特懋存書之賞  
猥需承學之臣敢不仰奉殊私俯殫繇力衷中朝副墨  
之要俟良史殺青之求穆王御駿以來歸已孤此望孔  
子感麟而有作尚見其人

謝除顯謨閣學士表

臣藻言准告一道伏蒙聖恩以臣編次徽宗皇帝詔旨  
進書了當持授臣顯謨閣學士尋具辭免蒙降詔不允  
者蒐求載籍僅輸掌故之勞越進通班益玷承明之選

蒙隆私之游及懼小器之難勝伏念臣少則嗜書老而  
憂國念廣記備言之所載雖諸侯小國以猶傳豈承萬  
世之丕基迺缺一朝之信史因露章而有請蒙給劄以  
兼收周旋雖閱于七朞綴輯敢忘于一日多識漢事徒  
竊慕于蔡邕績成晉書誰見推于陳壽豈意奏篇之瀆  
遽叨增秩之榮茲蓋伏遇皇帝陛下繼體守文奉先思  
孝既皇皇追慕望鼎湖弓劍之還宜汲汲纂修求石室  
圖書之備明詔周詢于海內遺編悉上于史官方博見

聞一新凡例而臣夙蒙眷委適就編摩固難追補于螭頭幸已獲臻于麟趾爰冒塵于乙夜俄超擢于西清仍許乃僚亦同茲賞臣敢不誓殫樸學仰稱明恩問周穆王之詩庶無慙于子革上段太尉之事當更採于宗元

案是表據宋史本傳當在知撫州後知徽州前紹興八年所作而事辭與前二篇相近故類次于此

### 謝笏帶表

楓宸黼扆誤參國論之餘象齒南金猥辱身章之錫拜手方承于帝命折腰已煥于朝班伏念臣奮迹諸生無



心膺任策名下吏但知斂版之恭服采周行常佩書紳  
之戒幸會真人之出亟叨近弼之除進侍軒墀每慙骨  
相忽被匪頒之渥始驚藩飾之優茲蓋伏遇皇帝陛下  
道貫三微禮先四近謂百度殫殘之殆盡當復于初憐  
孤臣衰朽之無堪特華其老肆垂異數加賁終身臣敢  
不尊如五瑞之儀寶若萬釘之玩書而對命不忘議論  
之忠束以立朝益懋筋骸之力

謝加食邑表

慶發九重恩加四海辱在廷紳之列猥蒙井賦之封下  
拜增輝中藏知感臣某恭惟皇帝陛下輯寧夷夏光復  
乾坤爰因渙號之頒例有真租之錫論效何殊于澣統  
冒榮乃甚于繁纓臣敢不奉以周旋退而黽勉念家無  
甌石既叨食采之田雖年在桑榆會有捐軀之日

謝授新安郡侯表

臣藻言准告命伏蒙聖恩以宗祀赦文授臣新安郡開  
國侯加食邑三百戶者禮洽中天慶覃外服猥奉十行

之詔就加五等之封伏念臣積冒恩私寢踰分願昨投  
閒于異縣蒙起廢于偏城久客還家方憩南飛之鵲通  
侯授印忽成左顧之龜雖滲漉以維均何遭逢之獨異  
茲蓋伏遇皇帝陛下調和萬類藩飾羣工屬宣室之受  
釐罄寰區而蒙福臣適臨本郡仍胙鄉州宋人并避以  
得封望胡及此漢將銀黃而誇里榮乃過之寵既逮于  
子孫忠敢移于生死

謝除中書舍人表

朝廷有命莫嚴內史之贊書溝瀆何知遽補甘泉之法  
從既冒久虛之選仍叨不試之除伏念臣居世寡諧資  
身無策一官平進安知巧宦之機半世倦遊長在窮愁  
之境昨幸蒙于起廢恩復許于參華適值時艱俄遭敵  
變身將淪于異域望已絕于中天豈意生還復膺器使  
備史職中興之始攝詞臣多士之餘所憂蕪累之陳不  
堪代匱乃誤便蕃之及遂使為真過分所期循名而懼  
茲蓋伏遇皇帝陛下兼收羣策光復丕圖謂聰明睿智

之有臨須號令文章之可述故于掌制必以能言而臣  
學昧淵源文惟雕篆况齒髮早衰于多病而精神新耗  
于百憂大懼曠瘵上孤甄擢雖不能草詔使武夫悍卒  
之涕流然常願輸忠俾君子小人之情得倘酬鴻造何  
有餘生

謝除兵部侍郎表

東省瘵官方祈病免中臺分職乃誤優遷資逢世以非  
宜寵逾涯而益懼伏念臣江湖遐裔章句小儒材不過

庸僅及下中之品學雖忘老安知左右之原偶隨多士  
之遊幸備公朝之選徧誇清貫遂綴邇聯旋遭值于干  
戈獲奉承于羈勒才因事見初無橫草之功茲與衰期  
乃有負薪之疾屢投誠于魏闕將歸卧于漳濱猥蒙內  
史之書俾貳文昌之秩戎昭所繫儒紱奚堪茲蓋伏遇  
皇帝陛下睿智有臨憂勤無逸光復祖宗之舊既已配  
天兼收文武之長未嘗愒日惟臣瑣質負國明恩竭股  
肱之力而徒有此心譬腹背之毛而何裨于用耗糜廩

食羞愧神明不辭勉效于秋毫顧恐溘先于朝露周六  
典治凡之職雖幸叨居漢九卿賜告之恩終期得請

謝除兼侍講表

視草禁嚴談經閒燕兼近侍進言之責極儒臣稽古之  
榮拜命以還撫躬而懼臣嘗謂天縱將聖奚須博學以  
成名王求多聞蓋欲取人而為善故自古右文之世必  
留心講藝之官如臣至愚何以仰稱茲蓋伏遇皇帝陛  
下卓然上智濟以克勤同漢祖之英論道不忘于息馬

笑齊侯之陋讀書見議于斲輪而臣猥以非才膺茲遴  
選第竭簡編之習仰承帷幄之光雖海岳深崇顧何取  
涓埃之細然聖賢聞見或不如農婢之專

謝除翰林學士表

非才冒寵久誇文石之班優詔傳恩趣上玉堂之直既  
假朝章之煥仍分御府之珍遜避莫從叨塵為懼伏以  
文章雖本一技命令實行四方故自古禁林之除極當  
時儒者之選矧今多士尤重他官內敷帝制之坦明外



應軍書之警急學非閱博難酬跋燭之咨思或淹遲將  
誤掣鈴之召當得瓌傑來承燕閒如臣者猥以諸生起  
于遐裔首尾策名之二紀中間不調者十年會真人光  
復之初陪列辟駿奔之後驟膺簡拔徧歷高華既時巡  
清蹕之屢移方驛召羣英之未至執羈在道視草無人  
姑從東省之聯兼候北門之對嘗因多病不勝狗馬之  
心願賜寬恩任逐桑榆之晚孰云代匱遂使為真茲蓋  
伏遇皇帝陛下志靖封疆憂深宵旰厲精于學每求稽

古之臣罪已以言欲致銷兵之福治雖得要人豈當材  
敢不仰佩眷知力思補報絲綸行遠顧奚俟于丹青海  
嶽居微或有資于塵露

謝除龍圖閣直學士知湖州表

論思無補席寵過優蒙內史之贊書預西清之更直載  
循僥冒采積兢危竊惟祖宗謨訓之藏上憲奎壁圖書  
之象敞禁楹而竝峙命儒學以遞居矧接駕鴻之游尤  
高龍馬之選法從假之而出守書生借此以為榮夫豈

孱庸所能堪副茲蓋伏遇皇帝陛下聰明稽古寅畏事  
天見賢而拔其尤每兼收于羣策撥亂而反之正將光  
復于丕圖而臣久服周行最為冗從入備內朝之供奉  
出分輔郡之顧憂雖遠清光實繫全度重高明之地悵  
已負于明恩踐文石之班敢遽忘于雅意

謝撫州到任表

吏最無聞宜從黜典戍期未畢轉畀名藩蒙拔擢之過  
優懼顛濟之益速嚴程及境涓月班春伏念臣蚤竊儒

科晚陪法從久汙禁林之直寢膺州紱之除去國三年  
長望蓬萊之氣移官千里遙瞻牛斗之墟矧江介之奧  
區實里門之鄰壤熟知風俗當省教條此蓋伏遇皇帝  
陛下運屬丕承志期光復采薇遣戍佇一月三捷之露  
聞細柳勞軍知李牧廉頗之可用凡在照臨之域舉懷  
馳騫之忱而臣投老無堪冒恩最甚雖一收朝蹟無復  
脩門然兩剖守符皆非凋郡方聖主躬巡于侯甸宜羣  
臣皆備于戎行乃從簡書莫扞牧圉惟州縣異承平之

日尤在恤民使里閭無愁歎之聲是為報國

謝徽州到任表

五年蓬藿之居僅終載筆百世枌榆之壤猥使分符既  
彈貢禹之冠仍衣買臣之繡即趨官守恭布詔條伏念  
臣早出寒鄉晚跨近列釋鋤耰而作吏幾四十年望旒  
宸以拜州纔二百里惟今日股肱之郡乃平生父母之  
邦行道咨嗟舉家感涕茲蓋伏遇皇帝陛下恢張治具  
駕馭人材謂臣不改歲寒故起之散地知臣素推月旦

故付以本州而臣久迫衰殘頗懷靜退雖邇封之易治  
惟緜力之難勝屬縣前驅初比緣于草檄行朝在望復  
何竦于移關誓捐不肖之軀仰報非常之賜

謝泉州到任表

案宋史本傳不言藻曾知泉州知鎮江府除江東提刑今就表中去

父母之邦及五嶺百粵三吳  
諸語辨其先後類次于此

恭承休命就易名藩去父母之邦接浙敢同于他國問  
蠻夷之俗褰帷如在于中州責重捫心恩深隕涕伏念  
臣昨從祠館叨領守符素號迂踈無問馬及羊之智乃

蒙安便得維桑與梓之州二年而勞力勞心一身而畏  
首畏尾力祈罷免反冒遷除雖賣劍買牛老猶堪于渤  
海然舉頭見日身益遠于長安茲蓋伏遇皇帝陛下總  
覈百工照臨萬國眷方隅之瀕海須師帥之得人故遣  
近臣往綏遐俗況今閩徼莫盛泉山既旁接書文之同  
當尤懲獄市之擾臣敢不仰遵寬大俯厲衰殘講求百  
粵之宜參諸禹貢奉上三年之計對以春秋

謝除江東提刑表

蠻方久次忽蒙恩詔之頒使節內遷仍獲鄉邦之便蓋  
始望未嘗及此雖自謀何以過之人知從欲以為榮臣  
獨感恩而至泣伏念臣早緣孤直叨備使令雖才疎屢  
至于顛躓然事白即蒙于超擢頃駕一朝之傳深行五  
嶺之區眷言風土之異宜常恐庭闈之動念既云盡瘁  
敢復圖安嘗中被于褒升亦寢忘于留滯豈期私計之  
上達不待終更而北還千里繡衣初入中原之郡縣雙  
親白髮重瞻故國之江山遂令忠孝之兩全何止平反



之一笑仰視必恭之梓旁連聽訟之棠茲蓋伏遇皇帝  
陛下衆建人材恢張治具薄海內外而竝照其智如神  
因時輕重而制宜以刑為體欲廣哀矜之意必求忠信  
之人謂臣素習于民情知臣粗安于名節特捐茲寵俾  
效厥官臣敢不奔走十城奉行三尺勤于夙夜盡人臣  
欲報之忠同我州閭樂陛下好生之德

謝鎮江府到任表

起廢江湖甫三周于歲籥疏榮觀闕凡四易于州麾嗟

治蹟之無聞辱除書之屢至人微責重天大恩深伏念  
臣積冒寵榮寢成衰朽咸謂陳人之安用獨蒙聖主之  
不忘念嘗陪扈于初年未忍棄捐于中道適當盛際徧  
歷名藩深行百粵之區遠薄三吳之境茲蓋伏遇皇帝  
陛下厲精求治虛已受言擇循良共理之人先悃悞無  
華之吏故如臣等亦在選中臣敢不恭布詔條具宣德  
意坐攬淮山之形勝深究古今心如江水之朝宗靡忘  
夙夜

謝宣州到任表

宣為輔郡古號名藩邈然千里之封蒙此一麾之賜聖  
恩加厚臣意知榮伏念臣昨自禁嚴叨分憂顧違天威  
而寢遠驚星紀之忽周雖中解于印章亦屢更于符竹  
比祗明詔往守遐陬顧期年何補于秋毫恐一旦溘先  
于朝露力陳誠懇仰瀆聽聞班超求入于邊關本緣衰  
病韓愈召還于海道喜見華風況承流密邇于行朝而  
上冢經過于舊里此蓋伏遇皇帝陛下得天人之助成

宗社之安混殊俗以為家視羣臣而若子念年迫桑榆  
之吏乃日陪羈縲之臣新建武之官儀不圖重見數貞  
元之朝士今已無多特予便安稍令親近臣敢不布宣  
寬大招復流逋課農桑阡陌之間庶為樂土誇觴詠溪  
山之上肯效前人

謝乞宮祠降詔不允表

上需頭之奏具述土思奉方底之函未容家食拜恩深  
厚省已衰殘伏念臣一去闕廷四叨民社雖竭從補外

屢膺符竹之頒然靡稱在前宜被璽書之責既力求于  
置散乃猶許于饗榮茲蓋伏遇皇帝陛下受命宅中隆  
寬盡下不替惟良之選猥私亡益之臣一心而同三千  
幸逢興運百里而半九十敢愛餘生

謝罷中書舍人除集英殿修撰宮祠表

臣藻言准尚書省劄子臣僚上言以臣攷試潭州進士  
何烈卷子內稱臣竝不舉覺回避特罷臣中書舍人准  
告授前件差遣者臣子事君當謹嫌疑之戒聖人容物

止從黜免之科既聯秘殿之班仍賦殊庭之祿惟天假  
寵何地酬恩伏念臣樸樾常材蹉跎半世遇陛下作興  
之始在羣臣推擇之中念平生值主之難常思奇節恥  
私智容身之陋復踵前規故因詞命之行務極論思之  
報庶絲毫之小益非蟲篆之空文而臣意廣于才寵逾  
其分乃昧嚴恭之禮自投鹵莽之誅如孟郊之應答參  
差唐人或有若何武之薦揚盤辟漢法豈容置散已優  
饗榮何幸茲蓋伏遇皇帝陛下隆寬盡下觀過知仁謂

子路使門人為臣雖誠悖理而徐邈云酒中有聖初亦何心程文尚許于蕪收攷吏奚妨于末減讞為失職斥使去朝臣敢不追訟悔尤過為兢慎畫馬者并尾而五常負譴憂網禽而去面之三永銜生賜

謝提舉江州太平觀表

撫凋瘵之民常憂意外汰疲駑之吏首在遣中雖卒抵于譴訶然實安于分願感恩至骨橫涕交頤伏念臣去國五年分符兩郡稟生無用嗟檇櫟之漫存視蔭幾何

況桑榆之已晚自從江湖之外不勝狗馬之心瞻帝所以寢遙知人言之必至力陳衰憊幸得罷歸方負負以何言果斷斷而不可尚叨冗從有愧空餐茲蓋伏遇皇帝陛下祇遙祖宗輯寧華夏攬英豪之策豈止虛已而問公卿重師帥之官未嘗單辭而專守長而臣自傷晚節孤奉明恩昔嘗叨直于九重今乃不堪于一障亟還印綬甘老鋤耰登俊良而治具畢張生非不遇坐輒弱而終身廢棄報自無期



謝再任宮觀表

參華法從均秩仙祠本清朝優老之恩豈愚者養疴之地猥蒙申命彌愧素餐伏念臣阻遠清光侵尋衰朽中華未復當先多士以著鞭衆傑竝馳乃效庸夫而高枕負國涵養為時指名茲蓋伏遇皇帝陛下篤孝于親擇賢而輔念搢紳之長物為羈勒之舊臣忍令中道之棄捐姑使全家之飽煖臣敢不偷安聖日待盡餘年挂神武之冠敢言長往刻浯溪之石願頌中興

謝罷知鎮江府除宮觀表

願投散地屢奏囊封懼速煩言卒蒙薄責荷聖恩之深厚矜微物之衰殘特與便安何勝感涕伏念臣早緣薄技誤簡淵衷當乘輿巡幸之時歷行闕高華之選一麾而臨千里違顏坐見于周星半歲而閱三州奔命幾馳于百舍食息未容于黔突姓名已挂于丹書既屈刑誅仍捐稍廩俾脫劇煩之地永全孤陋之身茲蓋伏遇皇帝陛下子視羣臣天臨萬物浩浩陶鎔之大拳拳簪履

之餘而臣生也有涯身其餘幾俟河清而已見幸同父  
老之歌去日近以雖榮無復軒墀之望

謝謫永州居住表

孱愚冒寵久仰日月之光盈滿挺裁自處雷霆之下蒙  
聖恩之寬大與善地以生全罪大心寒感深涕落伏念  
臣初無稱道積有悔尤所當退養于疲癯乃復寢成于  
老諄忽聞威命適在窮途冒風雪以疾馳越江湖而踰  
伏非恃冕旒之察難逃鈇鉞之誅茲蓋伏遇皇帝陛下

剛健法天聰明稽古干戈不用再臻全勝之時刑賞何  
心一付至公之論而臣靡思兢慎仰負函容餅居井眉  
雖有措身之地孤正丘首未知歸骨之期

謝永州再任宮祠表

六年循省敢逃司敗之誅一札哀矜復予奉祠之祿孤  
大恩而莫報雪衰涕以何言伏念臣承學無聞饗榮最  
久徒幸冒陞于班序不思祇畏于簡書自取顛隳合從  
竄殛蒙虧除于大戾止投畀于遐方未綿歷于歲時已

續頒于稍廩茲蓋伏遇皇帝陛下勵精庶政加惠微臣  
雖云原貸之已多亦復棄捐而未忍今于徙所拜此恩  
光捧詔天涯如獲望威顏于咫尺銘詩座右以明復玷  
缺之艱難誓策疲癯終期糜殞

又

間關百舍敢懷故國之心循省六年復竊真祠之祿聖  
恩加厚衰涕交零伏念臣推數奇窮負愆深重捫心無  
可言者擢髮皆自取之惟棄置以是宜何矜憐之敢望

冒陳微懇遽奉俞音如絲如綸聳九夷之觀聽繼粟繼肉寬百指之飢寒仰戴生成之私未知糜殞之所茲蓋伏遇皇帝陛下至仁惻怛大造鴻濛謂嘗陪文石之班且久在細旃之上憐此愚戇老于顛濟姑安處于遐荒使長霑于溫飽靡當盛夏而槁雖隔南訛葵見太陽而傾敢忘東向

又

自求口實輒貢于危衷下遂物宜亟頒于俞旨既切竿

摩之懼又增尸素之慚伏念臣頃從遠方入冠法從久  
無裨于毫髮居殆類于贅疣福過生菑志壹動氣甫一  
麾而出守凜百病之交攻力丐奉祠庶幾救死恭然疲  
役雖幸得以息肩儻若囚拘其何施而報國徒苟延于  
餘息益有負于初心豈謂隆寬復容因任茲蓋伏遇皇  
帝陛下至仁普詔大智有臨設官分職之甚嚴控名責  
實之惟謹然而疾必使之有養祿或加于無功如臣所  
蒙其比尤少蓋平日皆繇于忝冒而晚途洊賜以優閒

臣獲此便安敢云暇佚雖筋骸之非昔尊足者存顧年  
歲之幾何修身以俟

謝擅減均糴米數放罪表

臣藻言准尚書省劄子湖州奏昨承尚書省拋糴米三  
萬石及屬縣經承發運司糴米三萬五千石本州官吏  
輒上體國計下酌民情將兩項米一面分下諸縣各糴  
二萬石所有不候朝旨回降先次減免罪犯伏乞重賜  
黜責奉聖旨依奏仍犯罪者守藩無狀妄干專輒之誅



當宁原情遂虧已除之詔恩雖衆共幸獨臣多竊惟師  
旅之屯莫重餼糧之積矧當巡幸尤急轉輸乃緣凋郡  
之餘擅減太倉之入坐期譴黜反獲矜從此蓋伏遇皇  
帝陛下求治焦勞愛民惻怛謂區區郡邑敢懷閉糴之  
心而碌碌書生寧識泛輸之罪露奏方塵于乙夜免符  
已降于中天臣敢不推廣上恩訪求民瘼催科靡及既  
容拙于陽城矯制自歸復寬愚于汲黯誓與此邦之生  
聚共圖他日之糜捐

浮溪集卷五

欽定四庫全書

淳溪集卷六

宋 汪藻 撰

表

宰相星變待罪表

代

天事常象俄謫見於星文帝德罔愆蓋咎繇於臣等亟  
上需章之請願從質斧之誅未賜矜從若為退聽伏念  
臣等猥緣誤寵叨汙近司才不適時初無一日之效罪

乃累國致干三光之明既貽當宁之憂寧有在廷之理  
敢圖睿聖意在寅恭任天下之責而欲以身先修胸中  
之誠而不為文具謂象無虛應捷如形影之相隨儻變  
未能銷移寘股肱而奚益肆加訓勉累積兢危伏望皇  
帝陛下垂察父之仁體昊穹之意選于俊傑付以經綸  
無嫌大正于刑書勿使更妨於賢路既王省惟歲朝廷  
皆有用之才則德隆畀星社稷享無疆之福

又

天文見異既驗實於保章政路非人宜自拘于司敗薦  
布囊封之懇未行策免之誅尸祿為羞寘躬何所伏念  
臣偶緣人乏叨豫政機雖有慙愚慕蕭生之憂國略無  
事業如伊尹之格天致星氣之飛流勞宸衷之儆戒靖  
言塞變敢復逃刑爰席藁以自陳終叩閣而莫聽雖一  
人退託引過失以自歸然四海沸騰謂變調之安在伏  
望皇帝陛下稽格王之訓採輿論之公原大異之來臻  
皆具臣之所致博求賢佐修五事以承天母徇虛文使

百官之降物

代唐恪相公辭免觀文殿大學士表

扶顛弗效宜寘嚴科圖舊未忘更頌顯秩既負愆之萬  
坐敢忍死而一言伏念臣本以孤生起于遐裔邂逅寢  
叨於器使推排遂至于冢司既不能折衝綏遠而使敵  
寢謀復不能排難解紛而為王敵愾乃使四郊之多壘  
豈惟千里之畏人上孤君父之恩俯愧廟堂之地訂其  
罪惡肆市朝夫復何疑繩以憲章禦魑魅猶為未減尚

茲竊寵何以為顏伏望皇帝陛下於弱圖彊以威克愛  
原禦敵因循之至此繇在廷經濟之缺然欲使法行當  
從臣始盡錫爵秩快一時義士之心投畀要荒為萬古  
愚臣之戒

代何臬辭免左僕射表

愚誠上達願加攷慎之宜明詔中頒未改延登之意顧  
超踰之可懼敢冒瀆以終辭伏念臣初乏技能誤蒙知  
獎未閱十旬之久遍膺三省之除念學者平時嘗恥君

不及堯舜洎國家多事乃當饋嘆無蕭曹誓竭駑材志  
平仇敵偶獻可上符于天意自投閒復秉於政機方龜  
玉毀於櫝中莫知攘卻至梯衝舞吾樓上始議掃除尚  
賴隆寬未加顯戮所願顏行之前死夫何魁柄之敢知  
伏望皇帝陛下照以無私諒其非據收渙然之大號安  
蕞爾之孤踪別選英豪共圖康濟姑令選懦克清大慙  
以為期儻息搶攘雖處周行而奚恨

又



聖主之明未垂照察匹夫之守終冀哀憐情既迫於兢  
危義固難於泯默伏念臣材雖無取心實願忠自偕衆  
俊以還朝即值彊鄰之思逞方廟算有東隅之失舉朝  
臣無左足之先竊憤拘攣妄思策勵既安危之在此誓  
生死而以之雖然任大之難勝豈敢顧私而祈免然人  
主所圖之一相在朝廷實總於萬幾如遴選以得賢國  
無陋矣或叨居而累上人謂斯何伏望皇帝陛下俯諒  
曲衷無嫌遷令博選非常之俊追還已誤之恩方盛德

之中興固宜有佐矧虛懷之下逮何患無材重此投誠  
祈于得請

代汪伯彥樞密辭免表

聖神有作方收海內之人豪繇薄何為遽本朝廷之兵  
柄顧超踰之已甚雖庸懵以知辭竊惟樞筦之司實次  
鈞衡之任惟時初載交信順於天人宜帝遠圖注安危  
于將相儻以小人而大受孰為元老之壯猷如臣者生  
本寒鄉出陪多士早從外補甘心簿領之勞寔齒周行

敢意功名之會昨屬裔夷之謀夏猥承明詔以臨州內  
拊三軍雖無竒策外乘一障僅守故封會帥幕之肇開  
總兵符而入侍扞防牧圉跋履山川逮九五御圖之初  
預三千同德之列負羈縲而巡天下自知罪戾之多聽  
鼓鼙而思將臣敢幸搜揚之及既委腹心之寄仍加體  
貌之優非不願榮懼終速謗伏望皇帝陛下特垂淵聽  
俯諒危衷收渙汗之誤恩責捐軀之後效義非所處雖  
匹夫不可以利回情有可矜在明主固容於理奪

代汪樞密辭免覃恩轉官表

便蕃之寵弗許固辭震懼之懷終難安處敢再輸于危  
懇庶有槩于淵衷伏念臣猥自周行獲陪興運未閱半  
暮之久已躋二府之崇雖鴻恩務極于生成而小器自  
憂於盈滿矧國步艱難之後茲人臣隕越之時詎可包  
羞惟知冒進故屢上縷陳之牘願必還汎進之階子雖  
幸於父知天未從於人欲伏望皇帝陛下特垂簡炤無  
徇彝章念微臣事主者既本至誠則聖主待人者何憂

不貴肆頒明詔追寢誤恩免疎遠之孤蹤速僭差之大  
戾使鴻鷺共由之路行次而升則桑榆未盡之年皆上  
所賜

宰臣謝星變放罪表

代

高穹見異明輔相之非才聖主隆寬為蠢愚而屈法假  
以堯言之寵蠲其漢法之誅有覲在顏報恩何所伏念  
臣受材無取席寵過優初欲盡愚任宗社安危之寄終  
難語上昧天人精禋之交積政化之愆尤致星文之變

動既元聖克祗於天戒豈微臣敢違於邦刑雖帝念更生不使身罹於災異然人譏周勃罔知職在於陰陽罪既有歸幸安可數此蓋伏遇皇帝陛下丕承上帝加惠黎元方側躬脩行之時責惟已獨及銷變弭災之後福與人同故雖曠敗之餘亦在虧除之數臣敢不仰懲咎證俯戒空餐君已知言熒惑坐移於三舍臣當守職泰階願獻於六符

行在百官謝許乘轎表

臣勞于下宜無俟駕之行君恤其私至許肩輿之便一  
奉綸音之渥皆如砥道之平仰服恩憐惟知感涕臣伏  
以一人端拱百辟駿奔茲古今不易之規亦貴賤相安  
之分故雖遲暮猶合據掌儻在艱危何妨叱馭豈有遵  
途之近乃虞委轡之傷懷塞翁折臂之憂賜漢相小車  
之佚茲蓋伏遇皇帝陛下隆寬盡下內恕及人謂堂陛  
勢嚴雖俯仰有級廉之限然腹心情厚當戚休如手足  
之情方披棘以立朝適雨霜之在候慮乘款段或至顛

金史卷之二十一  
卷六  
濟乃曲軫於睿慈俾獲安於徐步愛念及此雖父兄何以加諸圖報謂何誓犬馬死而後已

代王樞密謝知建康府表

辭榮金馬尚繼粟於祠庭假寵玉麟驟承流於帥閫龍光有耀鯁腐奚勝伏念臣拱把微材任微猶可樞機近地據要豈宜輸勞報國之謂何移病乞身而遽去蚤暮道家之香火采戒易盈夢寐故里之江山敢懷共理祇荷寬疏之眷俾榮錦繡之歸俯僂拜恩扶攜就道猿驚



鶴怨昔愧草堂之譏虎踞龍蟠坐竊臺城之寄乍閱我  
理我疆之耘耨恍思某水某丘之釣遊者舊至于歡迎  
簪紳以為盛事昔王氏著稱於江左榮未如斯如韓琦  
被遇于昭陵勳乃稱此夫何異數猥繼前修此蓋伏遇  
皇帝陛下廣大法天英明冠古察臣誠深愛主視猶閨  
門父子之間憐臣老益懷鄉加諸閭里士夫之上桑榆  
炫日松檟回春臣敢不宣布中和激昂孱懦銷歎愁於  
四境嚴徵衛於九閭襟帶一江益念上流之重貔貅萬

旅願寬北顧之憂

代陸藻侍郎謝龍圖閣直學士表

鋒車趣召記甘泉法從之餘芝檢疏榮陞延閣清班之首恩光曲被感涕交流伏念臣頃以疾辭安于外補剖符方面兩膺南國之除持橐禁嚴四玷西清之選自守粉榆之壤屢驚蒲柳之秋身留閩徼之山川夢寄長安之鐘鼓所憂餘日莫陪鳴玉之班何意中天忽降賜環之命奔馳上道輟轉逾時曾未對於清閒已亟蒙於褒

叙賜之華秩寵以神毫豈伊蹠蹠之微蹤堪此便蕃之  
異數茲蓋伏遇皇帝陛下天臨萬物子視羣臣憐孤生  
去國之七年抱衰疾守藩于萬里靡由人譽召季布于  
河東因受帝釐見賈生于宣室特假河圖之峻用為州  
紘之榮豈惟示眷于始終蓋欲均勞于中外臣敢不益  
堅晚節無愧初心雖宿疾未除難矣筋骸之勉彊然大  
恩必報誓于肝腦之糜捐

代嘉王謝及第表

襲慶璇源幸備維城之列階榮桂籍俄先入彀之英廣  
陛臚傳諸儒園視共欣千載之嘉會親值一人之至公  
臣嘗謂朝廷設科目以致英豪學者用文章而守富貴  
故自古布韋之士有終身鉛槧之間既登鴈塔之標題  
至比龍門之變化豈有恩隆于帝胄更令名玷于賢書  
班聯玉笋之華光動金枝之秀由聖德曲成於小大視  
人材無間于親疎慮汨沒於膏梁特甄陶于翰墨肆垂  
淵問猥及孱蹤仰漸聖化之深雖能僅綴俯揆天資之

陋終愧無竒甫上奏篇遽陳殊等鵬擊天潢之浪鷺遷  
帝苑之春茲蓋伏遇皇帝陛下長育羣材并包衆甫謂  
秦之士賤由先王教養之衰方周以宗彊宜近屬獎成  
之急儻不俯同于寒畯孰為自致于亨衢昔慙假寵于  
分茅今喜成名於拾芥繫君父義方之素致邦家儒術  
之尊某敢不敦尚詩書勉思忠孝既與在廷之多士同  
值文興將令就傅之百男悉從隗始

代嘉王等謝車駕臨幸賜第表

宗藩肇啟既叨輪奐之榮詔蹕親臨遽望顯印之表荷  
恩曲被慙已非宜臣幸襲璿源躬承寶訓蚤賜真王之  
爵寢傳外傳之經行能未立而膺冠冢之儀術業非優  
而首在廷之選比講異宮之制遂蒙賜邸之恩方懷察  
父之親親寘之華構敢意聖君之下下賁以清光茲益  
伏遇皇帝陛下福與人同恩繇家始迺眷宗枝之肺腑  
適當夏屋之權輿欲兼示于榮懷宜特加于顧復上棟  
下宇將為百世之基前驅後陪首駐六飛之御事冠金

枝之籍光生銀榜之宮豈伊駒犢之微堪此風雲之遇  
臣敢不因多男之授職率羣弟以強宗既喜悒悒留萬  
乘經過之迹願為屏翰效千齡翊戴之誠

代劉正夫相公謝落致仕移鎮表

力疾造朝方釋違顏之念疏恩易節俄蠲請老之文用  
誕告于簪纓知稍寬于藥餌伏念臣久嬰宿疾阻望清  
光每慙體貌之過優益恨筋骸之難強比承恩詔入奉  
燕閒中懷踴躍之情坐失支離之苦既蒙迎勞仍許給

扶溢周旋慰藉之言略擊踞曲拳之禮引臨秘殿同父子以榮觀命食殊庭盡君臣之至意無毫髮不闕于聖慮顧丘山奚報于鴻恩茲益伏遇皇帝陛下德比隆天仁深察父憐孤忠之享上積有歲時喜病質之來前粗勝簪笏萃便蕃之異數光憔悴之餘生新封皆錫于嘉名誤寵更霑于愚息攷古遭逢之無比舉感涕泗以潸然臣敢不上體眷懷精加調護雖俯從微懇暫令申伯之歸然豫戒還期敢廢蕭生之意



代劉相公謝給展省先塋表

惟幄八年事靡秋毫之補江山千里恩容畫錦之歸敢  
圖荼爾之軀果遂浩然之志清光暫闕哀涕交零伏念  
臣生本寒鄉出逢興運夤緣恩寵秉政禁樞惟疾之憂  
每上煩於君父不能者止晚得請於朝廷朝遷旁及於  
族姻問勞相望于道路方竊蕭何之第遽為莊舄之吟  
許佩寵榮歸掃松楸之壟庶緣蕭散得全蒲柳之年身  
雖臥於漳濱心實存於魏闕茲益伏遇皇帝陛下天臨

萬物子視羣臣特軫孤忠常共股肱之喜方嬰宿疾忍  
令簪履之遺故屢貢於忱辭始曲回于淵聽至今疲曳  
入奉燕閒形天語之丁寧慰土思之宛結扶衰遠去豈  
尊鱸適為於秋風銜戀何言冀狗馬未先于朝露當逍  
遙於物外益調護于經生儻憑休養之仁得遂夷瘳之  
福故鄉雖樂敢久託於漁樵殘息稍蘇即再瞻於旒宸

代汪樞密謝賜鞶轡表

叢爾才微何補廟堂之數煥然被具猥分廡庫之珍恩

及私庭光生行路伏念臣偶從人末叨預政機雖戇愚  
務竭於微誠而萑斐已盈于淵聽所願歸乘于款段敢  
圖寵借於鮮明意在驅馳陋矣繞朝之策務為奢僭小  
哉新築之纓孰謂孱軀坐兼徽數茲蓋伏遇皇帝陛下  
眷懷舊物崇獎近臣予之宰者使便服乘授以轡者豫  
防蹶失于服馭之間不忘及此雖父兄之愛何以過之  
據此從軍誓扶衰而矍鑠攬之閱世敢無意於澄清  
代汪樞密謝子自北歸不令入城降詔獎諭表

主憂未釋難懷舐犢之私睿獎非常遽降恩綸之渥孤  
衷易感哀涕交零伏念臣頃竊州符適遭寇騎欲肆憑  
陵之虐先行刳質之威邀國重盟繫臣私屬防之百計  
難逃虎穴之深逮此經年寧有鴈書之信已分終天之  
訣忽聞問道之歸在於常情可謂至喜言念一人之孝  
尚違二聖之歡潁谷及親鄭伯方思于大隧廬陵在遠  
王綝敢顧于睂州雖復鍾情忍令會面豈謂抗章之瀆  
乃蒙青詔之褒天語一頒臣隣胥歎茲蓋伏遇皇帝陛

下配天業大撫物恩深知臣齒髮已凋常恐鄧攸之無  
後憐臣肺肝可見有如去病之辭家特示至懷用嘉微  
尚臣敢不因諧鄙願思副淵衷西伯在商輒妄希於閔  
天太公留楚誓博訪于侯生

代汪樞密謝覃恩轉官表

赫奕中興之運慶與衆均汪洋序進之恩施由近始薦  
被絲綸之渥惟深淵谷之危伏念臣資本腐儒進陪多  
士適在艱難之際誤蒙特達之知執羈縻以歷山川昔

知免矣秉樞機而坐廊廟今豈堪之所憂罪釁之盈更  
冒寵光之積雖云汎賞何異特遷茲盖伏遇皇帝陛下  
道冒羣倫功高遠古興滯補弊仰求列聖之心昭德塞  
違俯覈百官之實如臣被遇于世鮮倫臣敢不黽勉夙  
宵綏懷中外幸安可數懼器局之滿盈知無不為誓軀  
骸之糜殞

代薛左丞謝除門下侍郎表

久參帷幄方俟黜幽進貳機衡遽叨圖舊莫寢已成之

命惟深非據之憂席寵過隆撫躬何幸伏念臣粵從孤  
遠遭值聖明少誦師言每信書而違俗晚陪國論更充  
位以妨賢蒙淵鑒之誤知保孤衷而平進肆竭股肱之  
力何施毫髮之功豈伊白首之衰蹤堪此黃扉之重任  
雖緣人乏實玷詔除茲蓋伏遇皇帝陛下剛健粹精聰  
明齊聖疏通萬物之理灼見羣臣之心猥憐樸學之無  
他擢處周行之至要第崇資顯秩常收有用之材方治  
世昌辰尤急可觀之效誓勤鞭策力振綱維與多士以

同寅上承休德殞百身而圖報敢愛餘生

代薛昂門下謝本省書成回授二子轉官表

政省成書儒臣第賞炳然聖作慙潤色之非工至矣君  
恩許疏榮而及嗣孰云公器併在私門竊惟官制之新  
實係朝廷之重時稱右地莫要東臺欲具載于源流宜  
精加於筆削久更異意今見完書逮茲銓次之終篇乃  
以褒嘉而延世有如二息纔效一官于孤突教忠之言  
雖知粗勉若桓榮稽古之賜彼豈宜蒙既叨爵秩之升



仍冒身章之錫在庭莫望舉族生輝茲蓋伏遇皇帝陛下砥礪羣材陶鈞萬類取善隨長而未嘗以已施恩從厚而不止其身故雖碌碌以蒙成亦使洗洗而拜賜臣敢不退相規戒共保寵榮中懷舐犢之情能無抃蹈外弭維鵜之刺獨有糜捐

代何稟中書謝生日賜羊酒米麩表

叙顧復于私庭幸光初度出旨嘉于中禁益愧空餐繇禮厚于股肱致恩均于口腹詔頒甚渥跽受知榮伏念

臣稟性迂愚起家寒遠少依親膝但知駟犢之從長冒  
儒冠未免簞瓢之陋積叨誤寵遂汙近司初無寸效之  
經綸每辱淵衷之記錄門弧夙設雖嘗有志于四方鼎  
食載加大懼黜幽于終歲仰荷戚休之共坐令飢渴之  
忘茲蓋伏遇皇帝陛下道格三無禮優四近謂捐身許  
國既資于父以事君方推食用人宜醉以酒而飽德肆  
垂異數昭示羣工況臣千載逢時雙親就養用羞甘旨  
無煩潁谷之陳誓竭疲駑何止翳桑之報

代陳過庭中書謝生日賜羊酒米麩表

閭史記時叙劬勞于親膝臺臣致餽分食飲于君庖駭  
備物之前陳拜私庭而登受伏念臣材非敏幼世本單  
平早雖被於簡求中嘗遭于堙阨年書亥首甘為絳縣  
之老人氣稟崧高敢意周邦之良翰偶承人之參預政  
機徒驚蒲柳之衰莫致涓埃之效孰云淵抱每記孤蹤  
乃因載育之辰更厚屬厭之賜茲蓋伏遇皇帝陛下天  
臨萬物子跡羣臣曲垂體貌之私用贊股肱之喜臣敢

不退而飽德進以忘身持奉旨甘固異小人之食誓堅  
忠義永為孝子之門

代江西運使侯大夫謝鹽課增羨賜金紫表

民食懋遷仰遵成算身章蕃錫俄辱厚恩衣在笥以詔  
功口語心而知愧伏念臣奮身寒苦遭世盛明雖規畫  
不逮于中人然毫髮皆緣于上力蚤被鞭驅之數寢專  
飛輓之權輸貢土之毛登三僅足正牢盆之筭共二奚  
堪敢圖茂渥之繼來每有微勞而必錄畧銓衡之常法

加龜紫之殊榮使節增華計臣知勸茲蓋伏遇皇帝陛下天臨萬物柄馭百工器人于殿最之間礪世以賞刑之具故茲煩使不以遐遺飾三品之彌文為十州之榮觀疏恩不次已無反汗之絲砥節自修敢蹈維鷄之刺

代開封程振大尹謝上表

恩賜絲綸忽從中出任隆輦轂不以次遷舉萬方輻湊之區付一介顛愚之士身雖甚寵力恐難勝伏念臣生本寒鄉出陪多士少從師學僅知儒墨之是非長佩官

箴安識求由之果藝徒以昔參于儲禁斐然長奉于牋  
詞緣此孤蹤簡于聖聽逮自江湖之遠來瞻日月之光  
裁奉燕間即蒙褒擢俾佐銓衡之任初無根柢之容曾  
未逾時復叨進秩惟三輔幅員之大萃四民囊橐之姦  
必發摘如神方勝鋸筦之訟苟拊循非術能無桴鼓之  
驚誰謂鯁生可當器使茲蓋伏遇皇帝陛下留精治術  
端本京師欲令張敞之春秋稍施於政故試望之于馮  
翊非有所聞而臣自歷仕途未更吏治一旦任劇煩之

責衆人為縣薄之憂臣敢不用恕平反以文緣飾為四方之極庶幾無愧于周詩從一切之宜未肯追蹤于漢吏

代明州趙修撰謝到任表

罪更百謫方幸洗滌地鎮一隅猥分憂顧驟齒簪纓之列洵膺綸綍之頒仰服記存惟知感涕伏念臣早緣官使誤辱聖知忘辱瑣之無堪謂治理之可寄所期報稱不勝犬馬之心何意顛隳自處雷霆之下竭從詆棄深

省悔尤將投間置散以窮年悵補剝息黥之無日敢圖  
茂渥特予名藩惟茲瀕海之區自昔分符之選島夷修  
好護星使之行艦玉食薦新修鮭珍之貢筐豈伊人之  
堪此詔除茲蓋伏遇皇帝陛下垂布隆寬并包衆甫極  
天所覆既兼四海以為家與物咸新不忍一夫之失職  
欲因重負以紀成功臣敢不佩戴鴻私鞭驅絛力譬諸  
草木知亭毒之難酬收之桑榆或過尤之可贖

代鎮江府趙修撰謝到任表



鄞江上印甫遂收身京口分符復叨共理坐得江山之  
勝曾無歲月之淹望過所期感深以泣伏念臣早緣衰  
緒寔齒周行荷聖神特達之知更中外劇煩之選出將  
使指擢領州麾迺者代還喜於得覲方入趨於表著即  
召對于威顏永懷先世之孤忠嘗預本朝之大計紹興  
漢統喜丙吉之有謀追錄唐勳歎鄭公之無後肆頒異  
數特與名藩豈微臣詞訓之能然實上聖旌賢之至此  
茲蓋伏遇皇帝陛下恢張治具駕馭人材謂有祖必有

孫世傳忠義尚憂民如憂國政或循良用秘殿七年之  
資付長江一面之寄矧今臨治自昔要衝二千里之鄉  
關通波不隔十八年之官守故俗猶存惟此典成過于  
自擇臣敢不俯求民瘼仰服官箴門戶雖微永佩肯堂  
之戒江湖方遠益深存闕之心

代河北糴使程戶部謝到任表

久汙郎選甘為襤被之行擢領使華叨奉羸糧之寄銜  
命朝離于觀闕迎親夕至于封陞恩自曲成榮逾始願

伏念臣早緣樸學冒處周行甫辭州縣之徒勞即玷朝  
廷之臨遣寂無稱效積有悔尤點持江外之麾收預省  
中之籍繫上聖保全之厚嗟孤生報塞之難逮茲煩使  
之乏人復以薄材而奉詔惟河朔襟喉之地實兵屯飛  
輓之衝欲貸新陳長有餘而實塞當權輕重無甚賤以  
傷農方大計之仰成豈至愚之能辦茲蓋伏遇皇帝陛  
下鼎新庶政鈞播羣材因時內外而試以百為隨器方  
圓而取之數路顧斷斷鼠窮之技雖匪才堪然拳拳烏

哺之情能無祿養未投間散仍獲便安臣敢不力效涓埃無忘夙夜金湯積粟寬當寧之顧憂夫馬依人俟乘輅之歸報

代江東提舉監香楮大夫謝到任表

黽勉郡丞方虞官謗阜通邦貨忽領使華蒙睿獎之過優撫危躬而若厲伏念臣受材膚淺遭世盛明繇詩書誤綴于末科行州縣寢成于華髮分投間冗無復激昂孰云蒐擇之辰亦在鞭驅之數惟山海懋遷之利實朝



浮溪集卷六

欽定四庫全書

浮溪集卷七

宋 汪藻 撰

外制

隆祐太后推贈制

曾祖

朕惟國家諸后比德姜任攷其淵源皆有所自非一時  
勲閭之後則累朝將相之家惟其先置社稷於安斯子

孫享天下之養伊子太母實對前人既克濟于多艱盍  
推尊于奕世隆祐太后曾祖具官某早緣才奮式副時  
須建鷓鴣之旂肅清戎壘總貔貅之衆祇扈殿廬由功  
紀于太常故慶鍾于長樂念方伸猶子之禮何以慰弄  
孫之心是用特侈恩頒追崇祀始稽諸國典祿以王章  
活千人者封茲為顯報澤五世而斬豈限常規冀夫未  
泯之靈服我無窮之寵

曾祖母



婦從夫母從子於陰功及物為難而能使百年之後三世之孫履六宮之尊閱四朝之久其積累豈淺也哉隆祐太后曾祖母具封某氏胄出名家化行中壺靜專恭順蔚有采蘋之稱碩大光明行為夢月之慶發源既鉅再世而興既推母黨之尊宜極祖慈之報乃侈脂田之舊用為泉窻之榮家國同休啟魏邦之吉壤雲來致享隆孟氏之新祧尚爾有知保茲無斁

祖

朕以寡昧而託南面之尊于艱難而獲東朝之養欲厚  
外家之報孰如大父之親爰舉彝章用昭餘慶隆祐太  
后祖具官某戚畹之望將種之英沈迹下僚久抱孫吳  
之學流芳後裔蔚為馬鄧之家方隆坤育之儀盍煥廷  
揚之寵惟顯親孝之終也德本身修乃自義率而推之  
恩從祖始錫上公之峻秩荒大國之新封持我命書告  
於園邑

祖母

朕惟烝畀祖妣以洽百禮王者所以祀其先也雖吾羣  
臣亦得用此豈國家奉太母之尊而恩不及再世哉隆  
祐太后祖母具封某氏克承姆訓夙有閨風生子則賢  
初肇紀侯之慶至孫而大遂開渭水之祥天命既新坤  
儀方肅宜崇二室之配用赫九原之光推本徽音孰致  
思齊之盛相攸吉壤莫如全冀之雄尚我寵靈行于冥

漢

父

明德高漢兩京本伏波之貽慶懿安佑唐四世由代國  
之能賢於赫予家有嚴聖母更夷險于二紀繫安危於  
九重欲報之恩當循其本隆祐太后父具官某丕承徐  
國逮事泰陵早奮迹于周行獨有聲于外戚才堪共理  
屢分藩屏之符謀必折衝幾秉齋壇之鉞雖國勲之屢  
紀于人爵以未酬乃積陰功用隆坤極念慈闈之方正  
于卹典以疇先爰正台躔用宏禰廟為國家肺腑之式  
慰宮壺葛覃之思逝魄如存垂休曷已

母

后為王之貳繁德是宜母者女之師非賢曷似仰惟坤  
載懋育寰區伊厥範之非常于所生而可見爰加異數  
用發幽光隆祐太后母具封某氏以淑惠之資配高明  
之族身先胎教早成衣練之賢家積陰功遂發造舟之  
慶念隆長信之奉宜飾觀津之藏爰出明緡進封大國  
煥魚軒之故秩旌沙麓之初祥亢爾夫宗光吾戚里

宣和皇后推贈推封制

曾祖贈太保

塗山有娥有莘皆古諸侯國也以積功累行啟天子后妃之祥然本大源深必數世而後見繇今比昔天豈吾欺宣和皇后曾祖具官某挺獨善之資勵久幽之操太陰叶夢兆百年積德之餘華袞升班為三室薦饒之首屬興大隧之感遙正東朝之儀爰錫命書載光前烈正公台之顯秩加帝保之隆名尚作曾孫之休永為太上之輔

曾祖母贈越國夫人

后妃上直四星母育天下其流慶之源固豈一世之積  
哉宣和皇后曾祖母具封某氏以淑德宜內外之親以  
陰功篤幽明之祐乃啟當熊之懿實開降胤之祥既升  
配於至尊宜推崇于所本爰旌泉壤載啟湯封庶潛德  
之顯融與始基而緜遠

祖贈太傅

儷極之尊世無比者抱孫之澤今乃見之矧天下不足

解憂惟聖人無以加孝其於母黨敢廢邦彝宣和皇后  
祖具官某秉德自彊韜光不試雖心游物外無汾陽高  
密之勲然慶衍家餘有和熹懿安之裔方興懷于所恃  
盍加寵於其先是用慰我親闈顯其祖武升一品公台  
之貴為二南風化之光精爽如存寵靈奚遠

祖母贈徐國夫人

朕惟宣和皇后懋覲天之德儲夢日之休誕育眇躬纂  
承丕緒雖正宮闈之號尚遙親膝之歡乃寵家庭先崇



祖配宣和皇后祖母具封某氏稟靈有自漸德惟深早  
積閨中之仁百神所相遂生天下之母再世而昌既成  
位于后坤茲加封于王妣春秋合享上齊帝傳之夫今  
古縣休下視公師之子便蕃所及肝鬲其承

父贈太師

朕膺圖籍之尊念庭闈之報雖少康之承禹後實本有  
仍然文帝之自代來未迎薄后爰稽列聖之典載錫外  
家之恩宣和皇后父具官某善積諸躬實享于衆是生

聖女親育朕躬方進策于長秋宜顯親於厚夜眷惟禰廟之寵已極台躔之崇用是禋以密章班之袞職赫外家之孝祀慰吾母之慈心往厚所憑永綏乃後

母封福國夫人

周詩言后妃者無慮數篇而獨以葛覃為后妃之本豈非恭儉節用化天下以婦道者自其父母家始哉宣和皇后母具封某氏為女有事親之孝為婦有儀家之賢為母有積慶之實乃生柔德作合清躬既陟中宮丕顯

思齊之德蓋隆外氏大開新野之封以衍脂田之腴以  
增園邑之奉尚垂景福式稱嘉名

李綱用登極恩封贈制

父夔

木之升者本大而實蕃水之積者源深而流廣故自古  
真賢之命世必其先盛德之傳家具官某道本中庸氣  
全剛大潛心聖域蔚為學者之宗晦迹鄉隣靡逐世人  
之好名浮于位祉集其門是生謀國之英任我中天之

業肆因大賚載舉葬章正維垣一品之尊為窀穸九原之慶以遂顯親之志以崇教子之功尚爾幽間服吾褒寵

母吳氏

朕惟哀哀父母生我劬勞者古孝子不得終養之詩也故每于國家大慶緣人情而厚追封之典況相臣汝之自出顧可以不褒哉具封某氏家本望族嬪于名卿慶善所鍾是生人傑與吾同德有此茂恩載宏脂澤之封

用示泉扃之寵其欽褒顯慰爾子孫

妻張氏

朕嗣承大統凡公卿士大夫之家無不預被其澤也矧以德配吾任職之相者顧可以不褒哉爾婉淑之稱為時婦表傳中郎之業既以名家知京兆之賢自其平日肆因大賚載舉彝章宏湯沐之舊封渙閨門之新渥汝其任壺內之責使汝夫專國家之憂克濟艱難則為汝

慶

李綱封贈制

曾祖僧護贈少保

君子之澤更五世而未衰國家之恩雖九原而必及具  
官某潛德不耀老于鄉閭慶鍾其家既遠而大是生元  
弼濟朕中興肆于秉政之初伸汝顯親之志進居帝保  
茲謂公台尚繫明靈歆此光寵

曾祖母盧氏廖氏龔氏已贈郡夫人贈國夫人  
婦人之秩繫其夫與其子孫今汝夫登帝保之尊而三

世之孫則吾大丞相是也亦可以為榮矣具封某氏出於名家克配君子慶積而大實生英賢致身廟堂秉德陪朕屬此延登之寵伸其追遠之誠正位小君改封大國尚其精爽不昧欽承

祖賡贈少傅

賢者之報不必在身大夫之家則知尊祖矧吾元弼出汝慶門其于大父之親可後羣臣之寵具官某家傳經術世稟義方教子以忠既肯奮而且獲至孫而大遂自

葉以流根肆于柄任之初知汝陰功之自進居帝傳茲  
謂公台尚繫明靈歆此休命

祖母黃氏饒氏已贈郡夫人贈國夫人

吾與大丞相朝夕論天下事親莫二焉而爾為之祖妣  
嗚呼亦榮矣其于褒叙之典可不厚哉具封某氏稟性  
淑靈來嬪望族積慶流祉是生英賢先復中興為吾伊  
呂爰正魚軒之秩大開脂澤之封庶幾明靈服我休命

父夔贈少師制



謝裒以晉名士老于太常而慶集謝安李栖筠以唐直  
臣終于御史而寵歸吉甫蓋爵祿不酬于盛德則子孫  
必饗其令名具官某如古者儒登時膺仕學精以博得  
聖人至當之歸志大而剛有君子後彫之操早正樂鄉  
之位晚登延閣之班庶靜無求優游卒歲既辭榮而不  
有宜流祉於無窮生此真賢與予同德肆遇登庸之始  
爰加褒寵之優進位公師用光泉壤以示羸金之訓以  
明奮穫之功尚爾英魂服予休命

母吳氏已封郡夫人進封國夫人

朕讀衛人寒泉之詩覽魯侯壽母之章而知人子以不  
得終養為恨而以及親為榮也具封某氏壺範有聞嬪  
於雋老是生賢子佐朕中興爰因柄任之初益侈昨封  
之舊尚期精爽不昧欽承

妻張氏已封郡夫人進封國夫人

朕惟公卿大夫以學識自見於功名之會者豈獨師友  
淵源之力哉亦內德有助焉耳具封某氏族出華大媿

于宗工讀父之書勉夫以正肆予論相并寵其家爰開  
大國之封正爾小君之號是為光寵無怠欽承

顏岐初任執政封贈制

曾祖仲昌

孔氏顏氏皆魯國之望孔氏繇秦漢以來本支蟬聯文  
獻相屬而顏氏僅聞于宋齊之間至唐方顯今孔氏稍  
微矣而爾家三世皆有令聞為國光輝搢紳所慕豈聖  
賢之澤所行者遠其興也固自有次第哉具官某言為

人師行為世表以學從仕棲遲一官若子若孫前英後  
詰究觀厥慶其德可知爰因登俊之辰俾遂篤親之志  
加之峻秩振爾遺芳豈惟世家增譜牒之榮抑使士夫  
知為善之報

祖太初

朕思鳧繹之賢其流風遺書具存而其人不及見也雖  
後世無聞猶當有以褒大之矧其孫預吾機政而寵綏  
之數出于常典者哉具官某道德文章著于當代發明

古學獨得孟軻之傳疏闢化源聿興魯國之緒家承厥  
範再世似之皆因特起之招繼被非常之用雖其躬可  
貴寧須人爵之崇然以澤上覃難廢邦彝之舊宜頒宮  
保之命往赫冢祠之光庶爾名揚令吾俗厚

父復

昔漢陳寔以道理高世而其子紀紀子羣皆有令名信  
史書之以為盛事今吾顏氏亦庶幾焉具官某嗣謙退  
之風得精深之學氣剛而行峻用以立朝言信而文醇

見于垂世早被裕陵之眷晚登延閣之華有子而賢弼  
古之治爰因聞政之始用獎教忠之能繇法從之舊班  
正宮師之新秩魂而不昧尚克享之

滕康初任執政封贈制

曾祖

蕭瑀事唐八葉相傳而益大王祥在晉百年雖遠而屢  
興厥惟衣冠不絕之家必有廊廟非常之器今吾滕氏  
亦庶幾焉具官某學道聖賢傳家忠孝遙遙譜牒早為

族黨之華奕奕子孫常出鄉評之右既厥鍾之茂盛宜  
所報之綿長當此艱難生吾英傑竝屬延登之始爰加  
追錫之榮納祿重泉升班亞品尚焄蒿之不昧知焜燿  
于無窮

曾祖母陳氏王氏

婦人之德其賢不出于閨門王者之恩所報必通于泉  
壤非爾後昆之有立安能數世而益光具封某氏挺柔  
婉之資配高明之族化行於內既壺範之潛修慶衍其

卷七  
餘遂家聲之遐振因聞孫之入輔擇吉壤以增封正邦  
國小君之儀煥宗祧初室之祀其祚乃後永孚于休

祖

大夫之家則知曾祖賢者之報不必在身矧吾近輔之  
賢出汝慶門之大盍加異數用發幽光具官某養志安  
恬禔身孝謹力探載籍自表于儒先漫仕周行靡求於  
宦達觀本支之相望知朝夕之所存褒章以子而既窮  
恤典因孫而更越錫儲宮之峻秩揜家牒之前休往體



密章永安泉窆

祖母張氏鄭氏

位之尊者禮不可以不稱功之茂者報不可以不隆今  
吾二三執政大臣非其材者莫得而居也既在茲選矣  
雖祖妣皆與榮焉非稱情文而為之報也哉具封某氏  
閨風靜專母道慈懿以子而貴既參象服之朝至孫而  
昌復侈脂田之賜爰因初命載錫湛恩煥魚軒之舊儀  
明柱石之新紀九原雖邈不顯其承

父

璧琮之璞必出於方流松柏之材豈生於近阜注意功名之會每求忠孝之家具官某識造幾微氣函剛大知言之要文章為後學之宗直道而行議論得古人之正早挺險夷之節晚齊得喪之心雖嗟顏駟之不逢終喜臧孫之有後是生人傑參預政機因其履位之初懋以報親之典正宮師之峻秩隆廟祀之新儀旌而教子之忠成朕得人之慶盍緣肝鬲來對寵光

母常氏

父母之有令子猶國家之有良臣皆人之所願然也今  
吾用康任樞筦之事而實汝之所生蓋同其慶也其追  
封之典顧可以不厚哉具封某氏出於名家端靜有法  
配黔婁之德蓋嘗以道而相安生仲郢之材非止于先  
而無愧既有柄朝之命宜疏飾壤之恩荒千里之新封  
發九原之潛懿榮魂如在茂渥其承

故妻張氏

朕閱士大夫之家同艱難於婚宦之初而不得其貴寵也于疏恩之際既追榮其先則并及焉所以正風化之端厚人倫之本也具封某氏世胄高華嬪吾碩輔牛衣之泣雖效于生前翟裼之朝但榮于身後咸寧吉壤茲謂新恩從汝舅姑承休無斁

妻朱氏

古者諸侯之妻必齊姜宋子所以取其族出之大聞見之華有夙夜相成之道稱其服飾之盛而與君子偕老

也豈今公卿室家為助于內者其賢遽不如古哉具封  
某氏以崇寧大臣之子媿吾樞輔之賢婉孌靜專壺儀  
甚著小君之號非爾孰宜爾其勉夫子以功名忠孝之  
事協濟艱難無愧周詩所云則吾當屢封特封不一封  
而已也可不懋哉

桂州甘氏年九十可封太孺人制

朕恢崇孝治尊禮高年嘉涵養之遐區有期頤之壽母  
爰加封邑以厚人倫庶幾萬里之慶門尚見七朝之遺

俗

掌設王氏典言吳氏竝轉國夫人制


朕自潛藩入承大統汝祇婦職常侍宮闈其遷大國之封以視小君之秩益思淑慎用對寵休

宣和皇后姪女母吳氏封恭人制

朕感穎谷封人之言于母黨之親未嘗不致意也以爾常事外家實生息女宜加封號以示異恩尚保厥休無忘所命

恭福帝姬追封隋國公主制

尚親慈幼本骨肉之至情追遠厚終有邦家之令典具  
封某受靈寶緯敏粹璇源方欣設悅之祥已遇逝川之  
戚既安厚夜宜錫新章爰開主邑之封用正王姬之號  
尚期婉淑不昧欽承



浮溪集卷七